



11

7保4
5144
6



門
號 5144
卷 6-6 上

五代會要卷二十七

宋

王

溥

撰

鹽鐵雜條下

周廣順二年九月十八日敕條流禁私鹽麴法如後一
諸色犯鹽麴所犯一斤已下至一兩杖八十配役五斤
已下一斤已上徒三年配役五斤已上並決重杖一頓
處死一應所犯鹽麴關津門司廂巡門保如有透漏並
行勘斷一刮讎煎煉私鹽所犯一斤已下徒三年配役
一斤已上並決重杖一頓處死犯私鹽若捉到讎水祇

煎成鹽秤盤定罪逐處凡有嫌鹵之地所在官吏節級所由常須巡檢村坊鄰保遞相覺察若有所犯處彰露並行勘斷一所犯私鹽捉事告事人各資賞錢以係省錢充至死刑者賞五十千不及死刑者三十千一顆末鹽各有界分若將本地分鹽侵越疆界同諸色犯鹽例科斷一鄉村人戶所請蠶鹽祇得將歸蓀繭供食不得別將博易貨賣投託與人如違並同諸色犯鹽例科斷若是所請蠶鹽道路津濟須經過州府縣鎮委三司明行指揮一凡買鹽麴並須于官場務內買若衷私投託

與販其買賣人並同諸色犯鹽麴例一諸官場官務如有羨餘出剩鹽麴並許盡底到官如衷私貨賣者買賣人並同諸色人犯鹽麴科斷若鹽鋪酒店戶及諸色人與場院衷私貨賣者並同罪科斷一所犯私鹽麴有同情共犯者若是骨肉卑幼奴婢同犯祇罪家長主首如家長主首不知情祇罪造意者餘減等科斷若是他人同犯並同知情科斷遣若與他人同犯據逐人腳下所犯斤兩依輕重斷遣一州縣城鎮郭下人戶係屋稅合請鹽者若是州府並於城內請給若是外縣鎮郭下人

戶亦許將鹽歸家供食仰本縣預取逐戶合請鹽數目攢定文帳部領人戶請給勒本處官吏及所在場務同點檢入城若縣鎮郭下人戶城外別有莊田亦仰本縣預前分劈開坐勿令一處分給供使一應諸道今後若捉獲犯私鹽麴人罪犯分明正該條法便仰斷遣訖奏若稍涉疑誤祇須申奏取裁

顯德二年八月二十四日宣頭節文改正鹽法如後一贍國軍堂場務邢洺州鹽務應有見塚貯鹽貨處并煎鹽場竈及應是賺地並須四面修置牆塹如是地里遙

遠難爲修置牆塹卽作壕籬爲規隔內偷盜夾帶官鹽兼於壕籬外煎造鹽貨便仰收捉及許諸色人陳告所犯不計多少斤兩並決重杖一頓處死其經歷地分及門司節級人員並當量罪酌斷所有捉事告事人賞錢二十千一斤已上至十斤賞錢三十千一十斤已上賞錢五十千一應有不係官中煎鹽處賺地並須標識委本州府差公幹職員與巡鹽節級村保地主鄰人同共巡檢若諸色人偷刮賺地便仰收捉及許人陳告若勘逐不虛捉事人每獲一人賞絹一十疋獲二人賞絹二

五仁會要 卷二十一
十疋獲三人已上不計人數賞絹五十疋刮讎煎鹽人
并知情人所犯不計多少斤兩並決重杖一頓處死其
刮讎處地分並刮讎人住處巡檢節級所由村保等各
徒二年半令眾一月依舊句當刮讎處地主不切檢校
徒二年令眾一月一顆鹽地分界內有人刮讎煎煉鹽
貨所犯並依前法一今緣改價賣鹽慮有別界分鹽貨
遞相侵犯及將鹽入城諸色犯鹽人今下三司依下項
條流科斷其犯鹽人隨行物色給與本家其鹽沒納入
官所經歷地分節級人員並行勘斷一兩至一斤決脊

杖五十令眾半月捉事告事人賞錢五千一斤已上至
一十斤徒一年半令眾一月捉事告事人賞錢七千十
斤已上不計多少徒二年配發運務役一年捉事告事
人賞錢十千一諸州府人戶所請蠶鹽不得於鄉村裏
貨賣及信團頭腳戶縣司請鹽節級所由等剋折糶賣
如有犯者依諸色犯鹽例科斷一如有入於河東界將
鹽過來及自家界內有人往彼興販鹽貨所犯者並處
斬其犯鹽人隨行驢畜資財並與捉事人充賞

漕運

五代會要 卷二十七
後唐同光三年閏十二月吏部尚書李琪上疏曰臣伏思漢文帝時欲人務農乃募人入粟得拜爵及贖罪景帝亦如之後漢安帝時水旱不足三公奏請富人入粟得封關內侯及公卿已下散官本朝乾元中亦曾如此今陛下縱不欲入粟授官願降明敕下諸道合差百姓轉般之處有能出力運官物到京者五百石已上白身授一初任州縣官有官者依資次遷授次選者便與放選千石已上至萬石者不拘文武顯示賞酬免令方春農人流散此亦轉倉贍軍之一術也敕李琪所論召募

轉倉斛斗與官行賞委租庸司下諸州府有應募者奏聞施行

長興二年五月三日敕應沿河船般倉依北面轉運司船般倉例每一石於數內與正銷破二升

四年三月三日三司奏洛河水運自洛口至京往來牽船下卸皆是水運牙官每人管定四十石今洛岸至倉門稍遠牙官運轉艱難近日例多逃走今欲於沿河北岸別鑿一灣引船直至倉門下卸其工欲於諸軍兼人內差借從之

尋命捧聖衛指揮使朱洪實鑿開河灣至贍國倉門

周顯德二年正月上謂侍臣曰轉輸之物向來皆給斗耗自晉漢以來不與支破倉廩所納新物尙破省耗況水路所般豈無損失今後每石宜與耗一斗

四年四月詔疏下汴水一派北入于五丈河又東北達於濟自是齊魯之舟楫皆至京師

六年二月命侍衛馬軍指揮使韓令坤自京東疏下汴水入于蔡河侍衛步軍都指揮使袁彥浚五丈河以通漕運

倉

梁開平四年五月敕補開封府及河南河北倉吏非舊典也

後唐天成二年六月二十九日戶部奏先准天成元年五月十五日敕檢納夏秋苗子斛斗每斗祇納一斗官中納不收耗人戶送納之時如有使官布袋者每一布袋使百姓納錢八文內五文與擎布袋人餘三文卽與倉司充吃食鋪襯紙筆盤纏若是人戶出布袋令祇納三文與倉司

長興二年閏五月三日敕諸道州府所納兩稅斛斗今

後每斗上納加耗二合准備倉司耗折其收到布袋錢
仰官典同其繫署一分明上厯支緡

晉天福八年五月十五日三司奏天下今後諸倉請據
人戶元納耗二升內一升依舊送納本色充備鼠雀耗
折一升卽令人戶送納價錢兩文足與元納錢八文足
共一十文足充備倉司斗袋人夫及諸色吃食紙筆鋪
襯盤纏支費從之

周廣順元年正月敕節文其諸道州府倉場庫務宜令
節度使刺史專切鈐轄掌納官吏一依省條指揮不得

別納斗餘秤耗舊來所進羨餘物今後一切停罷

疏鑿利人

周顯德五年十一月以尙書司勳郎中何幼冲爲關西
渠堰使命於雍耀二州界疏涇水以溉田

閉糶

後唐同光三年閏十二月十九日敕今歲自京已東水
澇爲患物價騰湧人戶多於西京收糶斛斗近聞京西
諸道州府逐道皆有稅錢遂不通行乃同閉糶宜令宣
下京西諸道州府凡收糶斛斗不得輒有稅率及經過

水陸關防鎮縣妄有邀難

周廣順元年四月敕天灾流行分野代有苟或閉糴豈是愛人宜令沿淮渡口鎮浦不得止淮南人糴易

三年七月敕沿淮諸州點檢淮南人所糴量倉如是以

驢騾為馱及負擔過即放過不得以舟車輦運過淮是

淮南大旱井泉涸竭太祖愍之命許博羅至是聞吳人收糴入官以備軍倉詔止輦運過者

泉貨

後唐同光二年三月敕泉布之弊雜以鉛錫惟是江湖之外盜鑄尤多市肆之間公行無畏因是綱商夾帶舟

載往來換易好錢藏貯富室實為蠹弊須有條流宜令京城及諸道於行市行使錢內點檢雜惡鉛錫並宜禁斷沿江州縣每有舟船到岸嚴加覺察若私載往來並宜收納

天成元年八月中書門下奏訪聞近日諸道州府所買賣銅器價貴多是銷鎔見錢以邀厚利敕宜便行曉告如原舊破損銅器及碎銅即許鑄造器物如生銅器物每斤價定二百熟銅器物每斤四百如違省價買賣之人依盜鑄錢律文科斷其年十一月六日敕諸道州府

約勒見錢素有條制若全禁斷實匪通規宜令遍指揮三司及諸道州府其諸城門所出見錢如五百已上不得放出如稍違犯卽准舊條指揮其沿淮諸州縣鎮亦准元降敕命處分其年十二月敕行使銅錢之內如聞夾帶鐵鐵若不嚴設條流轉恐私家鑄造應中外所使銅錢內鐵鐵錢卽宜毀棄不得輒更有行使如違其所使錢不計多少並納入官爲科深罪

二年七月十二日度支奏三京鄴都並諸道州府市肆買賣所使見錢等每有條章每陌八十文近訪聞在京及諸道街坊市肆人戶不顧條章皆將短陌轉換長錢但恣欺罔殊無畏忌若不條約轉啟俸門請更嚴降指揮及榜示管界州府縣鎮軍人百姓商旅等凡有買賣並須使八十陌錢兼令巡司廂界節級所由點檢覺察如有無知之輩依前故違輒將短錢興販便仰收捉委逐州府柳項收禁勘責所犯人准條奏處斷訖申奏其錢盡底沒納入官奉敕宜依度支所奏

四年九月敕先條流三京諸道州府不得於市使錢內夾帶鉛鐵錢雖已約束仍聞公然行使今後有人於錢

陌內提到一文至兩文所使錢不計多少並納入官所
犯人准條流科罪

清泰二年十二月敕御史臺宜曉告中外不得使用鉛
錢如違犯者准條流處分

晉天福三年三月敕歷代鑄錢濟時爲寶久無監務已
絕增添近來趨利之人違法甚眾銷鑄不已毀蠹日滋
禁制未嚴奸弊莫止須行重法以息濫源宜令鹽鐵使
禁止私下行造鑄寫銅器其年十一月詔曰國家所資
泉貨爲重銷蠹則甚添鑄無聞爰降條章俾臻富庶宜

令三京鄴都諸道州府無問公私應有銅者並許鑄錢
仍以天福元寶爲文左環讀之委鹽鐵司鑄樣頒下諸
道令每一錢重二銖四參十錢重一兩或慮諸色人接
便將鉛鐵鑄造雜亂銅錢仍令三京鄴都諸道州府依
舊禁斷尙慮逐處銅數不多宜令諸道應有久廢銅冶
處許百姓取便開鍊永遠爲主官中不取課利其有生
熟銅仍許所在中賣入官或任自鑄錢行用其餘許鑄
外不得接便別鑄銅器如有違犯者並准三年三月敕
條處分其年十二月敕先許鑄錢仍每一錢重二銖四

參十錢重一兩切慮逐處缺銅難依先定銖兩宜令天下無間公私應有銅處有鑄錢者一任取便酌量輕重鑄造因茲不得入鉛并鐵及缺漏不堪久遠流行仍委鹽鐵使明行曉示餘准元敕指揮仍付所司

四年七月敕先令天下州府公私鑄錢近聞以鉛錫相參缺薄小弱有違條制不可久行今後祇官鑄錢私鑄錢下禁依舊法

周廣順元年三月二十八日敕銅法今後官中更不禁斷一任興販所有錢一色卽不得銷鑄爲銅器貨賣如

有犯者有人糾告捉獲所犯人不計多少斤兩並處死其地分所由節級徒一年鄰保人杖七十其告事人給與賞錢一百貫

顯德二年九月一日敕國家之利泉貨爲先近朝已來久絕鑄造至於私下不禁銷鎔歲月漸深奸弊尤甚今採銅興冶立監鑄錢冀便公私宜行條制起今後除朝廷法物軍器官物及鏡并寺觀內鐘磬鉞相輪火珠鈴鐸外其餘銅器一切禁斷應兩京諸道州府銅象器物諸色裝鉸所用銅限敕到五十日內並須毀廢送官其

私下所納到銅據斤兩給付價錢如出限及有隱藏及埋窖使用者一兩至一斤所犯人及知情人徒二年所由節級四鄰杖七十捉事告事人賞錢十貫一斤至五斤所犯及知情人各徒三年所由節級四鄰杖九十捉事告事人賞錢二十貫五斤已上不計多少所犯人處死知情人徒三年配役一年所由節級四鄰杖一百捉事告事人賞錢三十貫其人戶若納到熟銅每斤官中給錢一百五十生銅每斤一百其銅鏡令官中鑄造於東京置場貨賣許人收買於諸處興販其朝廷及諸州

見管法物軍器官物舊用銅製造并裝飾者候經使用破壞即時改造仍今後不得更使銅內有台使銅者奏取進止

四年二月十一日宣命指揮限外有人將銅器及銅於官場貨賣支給價錢如是隱藏及使用者並准元敕科斷其熟銅令每斤添及二百生銅每斤添及一百五十收買所有諸處山場野務採鍊淘沙到舊例銅每二十兩爲一斤今特與一十六兩爲一斤給錢一百三十收買兼知高麗多有銅貨仍許青登萊州人戶興販如有

將來中賣入官者便仰給錢收買卽不得私下買賣

諸色料錢上

梁開平三年正月詔曰祿俸所以養賢而勵奉公也朕今肇建諸色已畢郊禋職貢至多費用差少其百官俸料委左藏庫依前例全給

後唐同光三年二月十九日租庸院奏新定四京及諸道副使判官已下俸料請降敕各下逐處支遣兼除所置副使判官掌書記推官外如本處更妄稱簡署官員卽勒本道節度使自備請給不得正破係省錢物諸道

藩鎮請祇置節度使副節度觀察判官掌書記推官共五員節度使副料錢每月四十千依除實數錢廚料米一石麪二石內價錢三千蒿六十束柴三十束春服絹一十五疋冬服絹一十五疋綿三十兩私馬二匹草料節度觀察判官料錢每月三十千依除實數錢廚料米六斗麪一石六斗內價錢二千蒿四十束柴二十束春服絹一十二疋冬服絹一十二疋綿二十五兩私馬一匹草料節度掌書記料錢每月二十五千依除實數錢廚料米六斗麪一石二斗內價錢一千五百蒿三十束

柴一十五束春服絹一疋冬服絹一疋疋綿二十兩
私馬一匹草料節度推官料錢每月一十五千依除實
數錢廚料米六斗麪一石二斗內價錢一千五百蒿三
十束柴一十五束春服絹一疋冬服絹一疋疋綿二
十兩私馬一匹草料留守兼判六軍請置副使判官推
官三員副使依節度副使例判官依觀察判官例推官
依諸道推官例留守不判六軍請置判官推官二員判
官依節度觀察判官例推官依諸道推官例四京府請
祇置推官一員如已有判官卽不置推官其請受准留

守推官例其料錢准百官例折支所有廚料時服等卽
給本色右奉敕宜令諸道節鎮依舊更置觀察支使一
員其俸料春冬衣賜仍准掌書記例支遣餘依租庸院
所奏

餘推巡已下職員皆是本處自要辟請圓融月俸贍給亦訖依舊規繩省司更不支給錢物謹具如後防禦團練副使判官副使逐月料錢三十貫判官逐月二十貫刺史州元兼副使有者請廢其軍事判官所有月俸亦是刺史已俸內支贍三京少尹支料錢逐月三十貫赤縣令每月正授支料錢二十五貫考滿并攝比正官支一半主簿每月正授支料錢一十二貫考滿并攝比正官支一半畿縣令每月正授支料錢二十貫考滿并攝比正官支一半主簿每月支料錢一十

貫考滿并攝比正官支一半司錄參軍每月正授支料錢一十三貫考滿并差攝比正官支一半諸曹判司官每月正授支料錢一十二貫考滿并差攝比正官支一半文學每月正授支料錢五貫考滿并差攝比正官支一半參軍每月正授支料錢五貫考滿并差攝比正官支一半諸州府錄事參軍各依逐州上縣令支州判司各依逐州上縣主簿支一萬戶已上縣令每月正授支料錢二十三貫考滿并差攝比正官支一半主簿每月正授支料錢一十二貫五百貫考滿并

差攝比正官支一半九千戶已上縣令每月正授支料錢二十二千貫考滿并差攝比正官支一半主簿每月正授支料錢一十二千貫考滿并差攝比正官支一半八千戶已上縣令每月正授支二十一千貫考滿并差攝比正官支一半主簿每月正授支一十一千五百貫考滿并差攝比正官支一半七千戶已上縣令每月正授支二十千貫考滿并差攝比正官支一半主簿每月正授支一十一千貫考滿并差攝比正官支一半六千戶已上縣令每月正授支一十九千貫考滿并差攝比

正官支一半主簿每月正授支一十千五百貫考滿并差攝比正官支一半五千戶已上縣令每月正授支一十八千貫考滿并差攝比正官支一半主簿每月正授支一十千貫考滿并差攝比正官支一半四千戶已上縣令每月正授支一十七千貫考滿并差攝比正官支一半主簿每月正授支九千五百貫考滿并差攝比正官支一半三千戶已上縣令每月正授支一十六千貫考滿并差攝比正官支一半主簿每月正授支九千貫考滿并差攝比正官支一半二千五百戶已上縣令每

五仁會要 卷二十八 三
月正授支一十五千貫考滿并差攝比正官支一半主簿每月正授支八千五百貫考滿并差攝比正官支一半二千戶已上縣令每月正授支一十四千貫考滿并差攝比正官支一半主簿每月正授支八千貫考滿并差攝比正官支一半一千五百戶已上縣令每月正授支一十三千貫考滿并差攝比正官支一半主簿每月正授支七千五百貫考滿并差攝比正官支一半一千戶已上縣令每月正授支一十二千貫考滿并差攝比正官支一半主簿每月正授支七千貫考滿并差攝比

正官支一半五百戶已上縣令每月正授支一十一千貫考滿并差攝比正官支一半主簿每月正授支六千五百貫考滿并差攝比正官支一半五百戶已下縣令每月正授支一十千貫考滿并差攝比正官支一半主簿每月正授支六千貫考滿并差攝比正官支一半右租庸使奏重定料錢則例如前如諸道舊有取田處今後不得占留開破並依百姓例輸稅奉勅宜依長興二年閏五月起居郎曹琛奏文武兩班或請假歸寧或臥疾未損才注班簿便住料錢伏乞特降勅命者

勅今後文武官請准式歸寧假及病疾者並許支給本官料錢其月二十四日勅諸道行軍司馬副使判官已下賓寮等考滿未有替人宜令蠲金支俸料元不在省司給俸者不在此例

清泰元年七月勅洋王從璋涇王從敏每月各給料錢

一百千米麥各五十石僦人衣糧各五十分馬五十五

匹草粟

二王自方鎮入朝留洛陽私第故有是給賜

二年十月將作監丞龔封介國公宇文頡奏蒙恩龔封

除官無龔爵俸給詔特給本官俸

晉天福六年二月勅諸衛上將軍逐月加俸錢二萬

漢乾祐三年七月十六日敕節文諸道州府令錄判官

主簿宜令等第支與俸戶逐戶每月納錢五百與除二

稅外免放諸雜差遣不得更種職田所定俸戶於中等

無色役人戶內置不得差令當直及赴衙參如有闕額

及不逮明申州府差填不得衷私替換若是令錄判司

主簿除本分人數外剩占俸戶及令當直手力更納料

錢並許百姓陳告其陳告人與免戶下諸雜差徭所犯

人追毀告身更加力役如令佐錄事參軍內有員闕州

府差攝亦依例支與俸錢差攝曹官不得一例供破定
例如後三千戶已上縣令逐月一十二千主簿六千二
千戶已上至三千戶已下縣令九千主簿五千二千戶
已下縣令六千主簿四千錄事參軍判司依本部內戶
口取最多縣分例支破其錄事參軍依縣令例判司依
主簿例

周廣順元年四月勅牧守之任委遇非輕分憂之務既
同制祿之數宜等自前有富庶之郡請給則優或邊遠
之州俸料素薄以至遷除之際擬議亦難旣論資序之

高卑又患祿秩之升降宜分多益寡均利同恩冀無黨
偏以勸勛效今重定則例諸州防禦使料錢二百千祿
粟一百石食鹽五石馬十疋草粟元隨三十人衣糧團
練使料錢一百五十千祿粟七十石食鹽五石馬十疋
草粟元隨三十人衣糧刺史料錢一百千祿粟五十石
食鹽五石馬五疋草料元隨二十人衣糧仍取今年五
月一日後到任者衣前定例支其已前在任者所請如
故

顯德五年十二月中書奏諸道州府縣官及軍事判官

五代會要 卷二十八
一例逐月各據逐處主戶等第依下項則例所定料錢
及米麥等取顯德六年三月一日後起支其俸戶並停
廢一萬戶已上縣令逐月料錢二十千米麥共五石主
簿料錢一十二千米麥共三石七千戶已上縣令逐月
料錢一十八千米麥共五石主簿料錢一十千米麥共
三石五千戶已上縣令逐月料錢一十五千米麥共四
石主簿料錢八千米麥共三石二千戶已上縣令逐月
料錢一十二千米麥共四石主簿料錢七千米麥共三
石不滿三千戶縣令逐月料錢一十千米麥共三石主

簿料錢六千米麥共二石五萬戶已上州司錄事參軍
及兩京司錄每月料錢二十千米麥共五石司戶司法
每月料錢一十千米麥共三石三萬戶已上州司錄事
參軍每月料錢一十八千米麥共五石司戶司法每月
料錢八千米麥共三石一萬戶已上州司錄事參軍每
月料錢一十五千米麥共四石司戶司法每月料錢七
千米麥共三石五千戶已上州司錄事參軍每月料錢
一十二千米麥共四石司戶司法每月料錢六千米麥
共二石不滿五千戶州司錄事參軍每月料錢二十千

米麥共三石司戶司法每月料錢五千米麥共二石諸司軍事判官一例每月料錢一十千米麥共三石右諸州府京百司內諸司州縣官課戶莊戶俸戶柴炭紙筆戶等望令本州及檢田使臣依前項指揮勒歸州縣候施行畢具戶數奏聞仍差本州判官精細點數後差使臣覆視及有人論訴稱有漏落抵罪在本州判官及干係官典如今後更有人戶願充此等戶者便仰本州勒充軍戶配本州牢城執役從之

六年十二月詔諸道州府攝官起今後支給本所諸官

俸錢之半

迴鶻

迴鶻本牙在天德西北娑陵水上距長安六千九百里唐天寶中安祿山犯闕有助國討賊之功累朝尙主自號天驕會昌初其國爲黠戛斯所侵部族擾亂乃移帳至天德振武間又爲石雄劉沔所襲破之復爲幽州節度使張仲武所攻餘眾西奔歸於吐蕃吐蕃處之甘州其後時通中國世以中國爲舅朝廷每賜書詔亦嘗以甥呼之

梁乾化元年十一月遣都督周易言等入朝進貢太祖御朝元殿引對以易言爲右監門衛大將軍同正弟略麥之石論思並爲左千牛衛將軍同正李屋珠安鹽上並爲右千牛衛將軍同正仍以左監門衛上將軍楊沼爲左驍衛上將軍充押領迴鶻還番使通事舍人仇元通爲判官厚錫繪帛押領歸國又賜其入朝僧凝盧宜年思宜延錢等紫衣

後唐同光二年四月其本國權知可汗仁美遣都督李引釋迦副使田鐵林都監楊福安等其六十六人來貢方物并獻善馬九疋莊宗召對於文明殿乃命司農卿鄭質將作少監何延嗣持節冊仁美爲英義可汗至其年十一月仁美卒其弟狄銀嗣立遣都督安干等來朝貢狄銀卒阿咄欲立亦遣使來貢名馬

天成三年二月其權知可汗仁裕遣都督李阿山等一百二十人入貢明宗召對於崇元殿賜物有差其年三月命使冊仁裕爲順化可汗四年正月又遣都督掣撥等五人來朝貢授掣撥等懷化司戈遣令還

長興元年十二月遣使翟來思三十餘人進馬八十四匹

玉一團四年七月復遣都督李末等三十人入朝進白
鶻一聯明宗復召對於廣壽殿厚加錫賚仍命解放其
鶻

清泰二年七月遣都督陳福海已下七十人進馬三百
六十疋玉二十團至八月勅迴鶻朝貢使密錄都督陳
福海可懷化郎將副使達奚相溫可懷化司階監使屈
密錄阿撥可歸德司戈判官安均可懷化司戈
晉天福三年十月遣使都督李萬全等朝貢以萬全爲
歸義大將軍監使雷福德爲順化將軍

四年三月又遣都督拽里敦來朝兼貢方物其月命衛
尉卿邢德昭持節就冊爲奉化可汗五年正月遣都督
石海金等來貢良馬百疋并白玉團白玉鞍轡等謝其
封冊

漢乾祐元年五月遣使李屋等入朝貢方物並白玉藥
物等七月以入朝使李屋爲歸德大將軍副使安鐵山
監使末相溫並爲歸德將軍判官翟毛歌爲懷化將軍
周廣順元年二月遣使並摩尼貢玉團七十七白氍貂
皮羴牛尾藥物等

先是晉漢已來迴鶻每至京師禁民
勿私市易其所有貨寶皆中賣入官

私下市易者罪之至是太祖命除去舊法每迴鶴來者
私下交易官中更不禁詰由是玉之價直十損七八
顯德六年二月又遣使朝貢獻玉并礪砂等物皆不納
所入馬量給價錢時上以玉雖珍寶無益國用故因而卻之

吐渾

吐渾本吐谷渾也唐咸通中酋長有赫連鐸者從太原
節度使康承訓平徐方有功朝廷授振武節度使復盜
據雲中後唐太祖逐之乃歸幽州李匡儔其部族散居
蔚州界互爲君長其氏不常有白承福者自同光初代
爲都督依中山北石門爲柵莊宗賜其額爲寧朔奉化

兩府以都督爲節度使仍賜承福姓李名紹魯其畜牧
就善水草丁壯常數千人羊馬生息入市中土朝廷常
存恤之

後唐天成三年二月其都督李紹魯等遣使進馬一百
二十疋明宗嘉之賜紹魯竭忠建策興復功臣金紫光
祿大夫檢校太保至四年八月其首領念公山來朝貢
其年十月別部首領薛冀堆進狀乞授嵐州刺史明宗
在藩時常與冀堆有舊欲許之樞密使安重誨力諫乃
止至長興元年三月竟以冀堆爲嵐州刺史仍賜名萬

通

清泰三年二月以寧朔奉化兩府留後白可久超授檢校司徒副使赫連海龍檢校尚書左僕射兩府大夫李鐵匱檢校尚書右僕射

晉天福元年高祖以契丹有助立之功割鴈門已北及幽州之地以賂之由是吐渾部族皆隸於契丹其後苦契丹之虐政部族皆怨之復爲鎮州節度使安重榮所誘乃背契丹率車帳羊馬取五臺路歸國契丹大怒以朝廷招納叛亡遣使責讓至六年正月晉高祖命供奉

官張澄等率兵二千搜索并鎮忻代四州山谷吐渾還其舊地然亦以契丹誅求無厭心不平之命漢高祖出鎮太原潛加慰撫其年五月其大首領白承福及麾下念虎里赫連功德等來朝九月又遣首領白可久來朝少主嗣位絕契丹之好數召其酋長入朝厚加宴賜每大讌會皆命列坐於勛臣之次至開運中捍虜於澶州召承福等率其部眾從行屬歲多暑熱部下多死復遣歸太原移帳於嵐石州界然承福部下無法多干軍令其族白可久名在承福之亞因牧馬率本帳北遁契丹

授以官爵復遣潛誘承福承福亦思叛去事未果漢高祖知之乃以兵環其部族擒承福與其族白鐵匱赫連海龍等五家凡四百有餘人伏誅籍其牛馬命別部長王義宗統其餘屬

奚

奚本匈奴別種卽東胡之地人物風族與突厥同族有五姓一曰阿薈部管縣六二曰啜米部管縣四三曰奧質部管縣六四曰奴皆部管縣四五曰黑訖支部管縣三每部有刺史每縣有令酋長號奚王唐制兼饒樂府

都督居陰涼川東去營府五百里南去幽州九百里幽州置饒樂府長史一人以監之人馬約二萬後徙居琵琶川在幽州東北數百里出古北口地宜羊馬羊則純黑馬趨前蹄堅善走以馳獵爲務逐獸高山自下而上其勢若飛語與契丹小異爨以平底瓦鼎煮糲爲粥旣飪以寒水解之而食每春借邊民之荒田種稼秋熟乃來持穫畢則窖於山下人莫知其處所以木爲碓斷椽爲臼所受不過一斗自天祐初契丹兵力漸盛室韋奚霫皆受制焉故奚之部族爲契丹代守邊土暨虜人虐

其首領去諸怨之以別部內附徙於媯州依北山而居漸至數千帳故有東西奚之號去諸卒其子掃刺代立後唐莊宗破幽州賜掃刺姓李名紹威

後唐同光元年十二月遣使朝貢三年九月以莊宗誕節至遣使表貢方物

天成四年掃刺因翦瓜傷乃卒其子素姑代立亦時遣使入朝

清泰三年七月其首領達刺干遣通事介老奏其王素姑謀叛欲附契丹已處置訖權知部落廢帝降詔以慰

撫之

晉天福元年高祖以契丹有助立之功割鴈門已北及幽州之地以賂之由是奚之部族復隸於契丹自後常爲契丹之所役屬開運三年十二月契丹犯關其王拽刺以所部兵屯於洛陽及虜主死隨眾北遁

會要卷二十八

五代會要卷二十九

宋

王

溥

撰

契丹

契丹本鮮卑之種也居遼澤之中潢水之南遼澤去榆關一千一百二十里榆關去幽州七百一十四里其地東南接海東際遼河西北包冷陁北界松陁山川東西三千里地多松柳澤饒蒲葦其族本姓大賀氏後分為八部一曰旦利皆部二曰乙室活部三曰實活部四曰納尾部五曰頻沒部六曰內會雞部七曰集解部八曰

奚嗚部管縣四十一每部有刺史每縣有令酋長號契丹王唐制兼松漠府都督幽州置松漠府長史一人監之其後諸姓不常唐會昌中幽州節度使張仲武表其王屈戍請賜印篆爲奉國契丹之印朝廷從之其八族長皆號曰大人稱刺史內推一人爲王建旗鼓以尊之每三年第其名以代之唐末有邪律阿保機者怙強好勇不受諸族之代吞侵鄰部兵力漸盛嘗與後唐太祖會盟於雲中結爲兄弟其後僭稱帝號以妻述律氏爲皇后燕人韓延徽爲宰相法令嚴明諸部皆畏伏之

梁開平元年四月遣其首領袍笏梅老等來貢方物至二年二月其王阿保機又遣使來貢良馬五月又遣使解里貢細馬十疋金花鞍轡貂鼠皮裘并冠男口一年十歲名曰蘇女口一年十一歲名曰譬其妻述律氏貢朝霞錦前國王欽德并其大臣皆有貢獻太祖命司農卿渾特右千牛衛將軍郎公遠充使就本國宣諭三年閏八月又遣首領葛祿來貢方物太祖御文明殿召葛祿等五十人張讌賜金帛等有差至五年四月又遣使實柳梅老來朝貢

後唐同光二年三月阿保機率所部入寇新城其年七月又率兵東攻渤海國至九月爲鄰部室韋女真迴鶻所侵十二月又入寇嵐州三年二月復入寇幽州爲王師所敗俘其首領衢多等其年五月又遣使拽鹿孟等來貢方物

四年正月阿保機將復寇渤海國又遣梅老鞋里已下三十七人貢馬三十匹詐修和好

天成元年七月攻渤海國扶餘城下之命其長子突欲爲國主號東丹王其月二十七日阿保機得疾而死第

二子元帥太子德光嗣立德光本名曜屈之慕中國之名故改爲德光初阿保機有三子長號人皇王次號元帥太子次曰安端少君及阿保機死其妻述律氏令第二子元帥太子德光尙當兵馬令少子安端少君往渤海國代突欲將立爲嗣而元帥太子素爲部族所敬又其母述律氏亦常鍾愛故因而立之僞稱天顯元年尋葬阿保機於西樓番中地名僞謚大聖皇帝其年十月遣使設骨餒來告哀明宗輟其月十九日朝參以禮之其月僞平州守將領幽州節度使盧文進率戶口兵馬車帳

五代會要 卷二十九
來降至二年十一月又遣使梅老等二十餘人朝貢兼
申和好之意明宗命飛勝指揮使安念德齋錦綺綾羅
及金花銀器寶裝酒器等賜之又賜其母述律氏繡被
一張并寶裝瓔珞至三年正月復入寇陷平州而去至
其年五月定州節度使王都叛命潛相連搆其王德光
遣首領禿餒率裸虜數千騎入定州至七月又遣首領
惕憐等率七千餘騎來援尋爲行營招討使王晏球等
逆戰破之勦戮甚眾餘黨復爲幽州節度使趙德鈞襲
之殺獲殆盡擒其首領惕憐等其月王晏球等又獲契

丹絹書二封來進明宗命宣示羣臣莫有識其文字者
契丹本無文記唯刻木爲信漢人陷番者以隸書之半
就加增減撰爲胡書同光之後稍稍有之其年八月幽
州部送所獲番將惕憐已下六百餘人至京師明宗皆
赦之選其尤壯健者立爲契丹直其首領皆賜姓吉時
言事者以爲胡人悻戾不可置於君側俄而有首領吉
趙實自京遁歸奪船過河至深州捕獲斬之至其年閏
八月僞平州刺史張希崇來降四年二月定州行營招
討使王晏球擒禿餒等二千餘人獻於闕下悉命戮之

五代會要 卷二十九
長興元年十一月契丹渤海國東丹王突欲率番官四十餘人馬百匹自登州泛海內附明宗御文明殿召對及其部曲慰勞久之賜以衣冠金玉帶鞍馬錦綵器物等突欲進本國印三面命宣示宰臣其年十二月中書門下奏契丹國東丹王突欲遠泛滄溟來歸皇化請賜姓名仍准番官入朝例安排謹按四夷入朝番官有懷德懷化歸德歸化等將軍中郎將名號又本朝賜新羅渤海兩番國王官初自檢校司空至太保今突欲是阿保機之子請比新羅渤海王例施行勅渤海國王人皇

王突欲契丹先收渤海國改爲東丹其突欲宜賜姓東

丹名慕華授光祿大夫檢校太保安東都護兼御史大

夫上柱國渤海郡開國公食邑一千五百戶充懷化軍

節度瑞慎等州觀察處置押番落等使二年九月復賜姓李名贊華三

年五月授滑州節度使爲廢帝所殺至二年其契丹王母述律氏以其子

突欲歸國遣使朝貢明宗深慰納之至三年三月禮賓

使梁進德自契丹報聘迴稱其王請放前刺舍利還本

國前刺亦定州所獲番將也又謂去年十二月十二日其王帳前有

大星晝隕聲若雷震其月又遣使鐵葛羅卿進馬三十

五代會要 卷二十九 五
正亦求薊刺歸國故也五月鐵葛羅卿迴明宗欲放薊
刺等令歸大臣爭之未決會幽州節度使趙德鈞上表
論奏及易州刺史楊檀皆言不可遣其事乃止仍遣薊
骨舍利隨其使歸不欲全阻其請也其年七月又遣使
都督述祿進馬三十疋

清泰三年五月晉高祖起義於太原九月官軍集於城
下晉乃閒道發使召德光爲援是月德光率部落五萬
餘騎至太原城下尋敗招討使張敬德楊光遠之兵降
晉安大砮

晉天福元年十一月高祖踐位以德光有援助之力歃
血爲盟結爲父子仍約歲輸絹十三萬匹割鴈門已北
及幽州所屬縣並隸番界德光又率兵逐高祖於潞州
繫幽州節度使趙德鈞并其子樞密使趙延壽而迴二
年二月德光遣使子解里舍利梅老來聘三年十月又
遣使來上尊號曰英武明義晉祖繼命宰臣馮道趙瑩
劉昫等齎寶貨珍幣歲時進貢不絕德光亦遣名王已
下來至六年六月鎮州節度使安重榮執契丹使拽刺
等以輕騎掠幽州之南界高祖累遣中使齎詔開諭以

五代會要 卷二十九
契丹有助王之功不欲負其宿約而重榮奸險肆志竟
誅拽刺等馳檄天下言契丹之罪惡與襄州節度使安
從進連謀不軌高祖命杜重威率兵討之至貝州宗城
縣相遇重榮之眾大敗至七年正月二日收復鎮州斬
重榮首漆之送於契丹至其年四月高祖不豫六月崩
少帝嗣立八月遣使郎五來致弔兼獻衣服鞍馬等至
十月又遣使大卿已下二十六人來聘以高祖山陵有
日致祭故也至九年正月德光遣趙延壽趙延照等率
兵五萬人寇貝州少帝發兵屯守澶州初青州節度使

楊光遠構逆謀乃繕治城隍蓄聚芻粟爲跋扈之計屬
歲不稔餓殍相繼朝廷以廩帑虛竭軍用不給仍發使
郡縣括借民家資財斛斗海內嗷嗷不堪其命光遠遂
以重利誘德光入寇又以趙延壽等皆中原人士常有
思歸之意冀羣兇盜國晉祚不濟則大福在己其月德
光自河閒率諸部兵入犯甘陵陷之巡檢使吳巒投井
而死河北大擾少帝駐蹕澶州命宋州節度使高行周
等將兵以禦之三月德光自領襍虜十餘萬來攻城城
官軍拒之而退又以趙延壽行魏博節度使改封魏王

以延壽門人高融爲節度副使統步奚及燕軍數萬營於南樂四月又陷德州博州其年十二月德光又率眾南下攻圍鎮州諸邑皆陷之

開運二年二月前鋒至邢州鎮州節度使杜重威差人開道告急少帝欲親率大軍渡河決戰乃命鄆州節度使張從恩等將兵合諸將之師屯於邢州時德光之眾已及魏府建牙於元氏從恩等引軍而退其月又陷邢州刺史沈斌死之至三月德光退杜重威等率兵攻契丹之秦州下之迴及陽城爲德光精騎所圍諸將等決

力死戰德光大敗至三年八月契丹所部瀛州刺史僞言納款少帝復命杜重威等率大軍迎降至十一月迴及鎮州之東垣渡與番相遇十二月六日遣前鋒奪橋爲番軍所敗其月十日杜重威等以軍降於德光命相州節度使張彥澤率漢騎二千先入京城至明年正月一日德光自將大軍至京北百僚素服班於野次匍伏請罪皆命釋之尋降授少帝檢校太尉負義侯令挈其族及將相近臣等於契丹黃龍府安置二月德光僞降赦改國號大遼稱會同十年升鎮州爲中京以燕王趙

延壽為大丞相中京留守三月德光白京率眾北歸至
 四月十八日死於樂城其年五月宣遺制以永康王兀
 欲襲其偽位永康王者東丹王突欲之長子兀欲自以猶子不當嗣位
 且不奉祖母之命其諸部首領素畏述律氏之酷法復
 以阿保機死於渤海國被殺者百人今德光沒于漢地
 慮必獲罪如前同謀以其月二十一日領部族歸國述
 律氏拒於石橋番中地名其眾悉降於兀欲命送述律氏於
 阿保機明殿以幽之阿保機陵寢謂之明殿偽改會同十年為天
 祿元年自稱天授皇帝

漢乾祐三年十一月兀欲率騎數萬南寇陷邢州之內
 邱縣深州之饒陽縣

周廣順元年正月太祖命左千牛衛將軍朱憲往修和
 好兀欲亦遣使裹骨支報命獻良馬四匹太祖復命尙
 書左丞田敏供奉官蔣光遂銜命往聘至其年四月田
 敏等迴兀欲遣使實六獻碧玉金鍍銀裹鞍轡并馬四
 十匹其月太祖又命左金吾將軍姚漢英右神武將軍
 華光裔往使至其年九月兀欲為部下太寧王韓王燕
 王述軌所殺述律德光之子勒所部兵誅太寧王述軌述律

自立號天順皇帝改名明偽稱膺歷元年

顯德元年春太原劉崇將圖南寇述律使番將楊衮率虜騎萬餘以助之三月世宗親征與崇戰於潞州高平縣之南原崇軍大敗番眾棄甲而遁二年三月命許州節度使王彥超等築壘於李晏口與番兵數千騎戰於安平縣之南敗之

党項羌

党項羌古析枝之地漢西羌之別種其地東至松州西接葉護南雜春桑迷桑諸羌北連吐谷渾處山谷間互

三千餘里種有數姓自為部落一姓之中復分為小部落有細封氏費聽氏析利氏頗超氏野辭氏房當氏米禽氏拓拔氏而拓拔氏最為強族俗皆土著居有棟宇織毛罽以覆之其人多壽或至百五六十歲不事生業好為盜竊前世或來朝貢自唐寶應貞元之後皆率部族內附居慶州者號東山部落居夏州者號平夏部落會昌初命三使以統之在邠寧延州界者命侍御史崔君會主之在夏州者命侍御史李鄴主之在靈武麟勝州者命侍御史鄭賀主之後唐同光二年二月遣使朝貢十二月其首領簿備香

來貢良馬

天成二年九月河西党項如連山等來朝貢進馬四十匹

四年四月勅沿邊置場買馬不許蕃部至闕下自上御極已來党項之眾競赴都下賣馬常賜食於禁廷醉則連袂歌其土風凡將到馬無駑良並云上進國家雖約其價直以給之然計其館給賜資每年不下五六十萬貫大臣以爲耗蠹中原無甚於此因降勅止之雖有是命竟不能行其年九月首領折遇明等來貢方物十月

首領來有行來朝進馬四十匹上御中興殿閱所進馬樞密使安重誨奏曰吐渾党項近日相次進馬皆給價直對見之時別賜繒帛計其所費不啻倍價請止之上曰國家常苦馬不足每差綱收市今番言自來何費之有外番朝貢中國錫賜朝廷常事不可以止自此番部羊馬不絕於路

長興元年正月其首領來朝貢授萬德懷化司戈其年十二月以党項折家族五顛都知兵馬使折之正爲檢校尙書右僕射簿備家族都督簿備撒羅檢校工部尙

書

二年正月首領折七移等進馳馬其年十二月又遣首領來獻所奪得契丹旗號並馬等

三年正月以西路党項部族劫掠使臣及外域進奉命邠州節度使藥彥稠靈武節度使康福等率步騎七千往方渠鎮已來討其叛命者其年二月行營邠州節度使藥彥稠等奏誅党項阿埋三族韋悉裊勒彊賴埋廝骨尾屈悉保等七族七百餘人又率兵自牛兒族入白魚谷追及背叛黨白馬慮家六族客戶三族獲大首領

連香李八薩王都統悉邠埋摩侍御乞埋崑悉逋等六人兼黨類二千餘人獲馬牛羊數千計至晚師還野次其地無水軍士方渴俄有風雲自東而起是夜初更降雪一尺軍中以為神助上令告捷使史萬山宣諭軍中所獲牛羊等物各令士卒自取勿得收斂以進奉為名周廣順二年六月以府州党項泥也六族防禦使歸化將軍泥香王子又泥也大首領拓拔山並為歸德將軍三年二月慶州刺史郭彥欽奏党項野雞族掠奪商旅請出兵討之時彥欽贖貨嗜其利以州北野雞族多羊

五代會要 卷二十九
馬作法擾之番情獷悍屢不從順乃誣奏之太祖遣中使齋詔撫諭部族既苦彥欽虐政不時報命遂詔邠州節度使折從阮合靈州刺史張建武兵進討之建武勇于立功徑趨野雞族追擊殺數十百人有喜王族折思族殺牛族彼無猜貳聞官軍討伐竟來餉餽官軍利其財貨皆劫掠之諸族乃相聚官軍至包山負險之地逆戰敗之投崖谷死者甚眾折從阮保兵而退太祖怒彥欽勒歸私第左遷建武為率府率命前解州刺史鄭元昭為慶州刺史以招撫之

于闐

于闐在京師西九千九百餘里西南帶蔥嶺與婆羅門相接去三千餘里南與吐番接西北至疎勒國二千餘里國城之東有白玉河西有綠玉河次西有烏玉河其源同出於崑岡山去于闐西一千三百餘里每歲至七八月小水之後取玉於河謂之撈玉官取之後方許私取禁令甚嚴地多蒲萄醞而為酒味極醇美其俗好事祇神唐貞觀中其王伏闕信來朝復遣子入宿衛其後亦時來朝貢

五代會要 卷二十九
晉天福三年九月其王李聖天遣使馬繼榮進白玉白
氈犛牛尾紅鹽鬱金礪砂大鵬砂玉裝鞦轡等物其年
十月冊聖天爲大寶于闐國王命供奉官張匡鄴爲國
信使仍授入朝使馬繼榮爲鎮國大將軍扶風郡開國
公食邑二千戶副使黃門將軍國子少監張載通試衛
尉卿監使殿頭承旨通事舍人吳順規試將作少監
漢乾祐元年五月復遣使朝貢六月以入朝使王知鐸
爲檢校司空副使張文達判官秦元寶爲檢校左右僕
射監使劉行立檢校兵部尙書

突厥

突厥之始前書載之備矣自號可汗猶古之單于妻號
可賀敦猶古之闕氏也子弟謂之特勒別部領兵者皆
謂之設其大官屈律啜次阿婆次頡利法次吐毛次俟
斤並代居其官而無員數父兄死則子弟襲其位北番
之中最爲強盛至唐室末爲諸番所侵部族微弱亦嘗
來朝貢

後唐天成二年正月其首領張慕晉朝貢

長興二年正月其首領杜阿熟來朝貢

五代會要卷二十九
晉天福六年七月其首領遣使薛同海已下一十七人
來朝貢

五代會要卷二十九

五代會要卷三十

宋 王 溥 撰

吐番

吐番在長安西八千里本漢西羌之地其種落莫知所
出或云南涼禿髮利鹿孤之後其子孫以禿髮爲國號
語訛謂之吐番國人號其王爲普贊置大論小論以統
理國事無文紀刻木爲約其國王與臣下一年一小盟
三年一大盟其俗隨畜牧不常其居然亦有城郭都城
號邏些城屋皆平頭貴人處於大氈帳謂之排盧不知

節候以麥熟為歲首唐貞觀中常來朝貢自後吞併諸番兵力日盛屢為邊患河西隴右之地悉為所取至大中初其國亂朝廷復得六關之地至唐室末又為侵據

唐分天下為十道河西隴右三十三州涼州最為大鎮土地沃壤人物繁庶開元天寶中置八監牧馬三十萬雜畜稱是其西復置安西都護府距長安八千里羈縻西番三十國軍鎮監務大小三百餘戍守之兵皆取涼州節度及安祿山犯闕肅宗在靈武盡召河西戍卒收復兩京吐番乘虛遂取涼隴華人百萬陷于腥膻開成之際朝廷遣使還番過涼肅瓜沙城邑如故華人見漢旌使齊夾道泣訴問皇帝還念陷番生靈否當時已經再世雖語言小訛而衣服未改至今涼州漢戶猶稱上代是鄆州戍卒每帥守闕則請命于朝廷

梁開平二年正月遣使朝貢二月以吐番入朝使嗚末

首領杜論悉伽杜論心為左領軍衛將軍同正嗚末蘇論乞祿為右領軍衛將軍同正

乾化元年十一月又遣使來朝召對於朝元殿賜金帛等遣之

後唐天成二年十一月遣使野利延孫等入貢并番僧四人持番書二封人莫識其字

三年正月以入朝使野利延孫等六人並為歸德將軍其年九月又遣使朝貢以入朝使閻薛羅等三人並為歸德司戈十二月又以入朝使薛竭薛王子撥遣為歸

德郎將首領十人並爲歸化司戈
四年九月西涼府番官撥心等來朝十月首領撥里忙
布蘭邇等來朝並授歸德司戈

長興三年二月又遣使朝貢三月以朝貢使左廂首領
野利閭心爲歸德大將軍右廂首領錢心爲歸化郎將
軍中廂首領李讀等並爲歸德司候重云都督對兒六
突兒雞等並爲歸德司隍其年七月復遣使入朝引對
於端明殿問本番牙帳去京師遠近對曰在涇州西二
千里

四年十一月遣使來貢召對於內殿賜以金帛仍各賜
虎皮一張

晉天福四年十月罷延族大首領聶襄郎彝磨標昌訶
尤羅祇襄等率其屬朝貢

周廣順二年九月河西節度使申師厚奏吐番首領折
逋支等請加恩命其月勅以吐番左廂押番副使折逋
支右廂崔虎心並授銀青光祿大夫檢校工部尚書陽
妃谷大首領沈念般授懷化大將軍左廂大首領錢干
閻篤爲歸德大將軍沒林葛于凝盧伴邇折逋窮羅並

爲懷化大將軍右廂大首領鹿悉迦阿羅岳騷奴並爲歸德大將軍沈念般牝與龍文温光積並爲懷化大將軍中廂首領岳阿西安九十並爲懷化大將軍又奏自涇州安國鎮至西涼府沿路三處控扼各立州名欲補大首領爲刺史又管州界部落大首領三十餘人各賜空名告身並從之

高麗

高麗本扶餘之別種其國都平壤城卽漢樂浪郡之故地在京師東五千一百里東渡海至於新羅西北渡遼

水至于營州南渡海至于百濟北至靺鞨東西三千一百里南北二千里其官大者號大對盧比一品總知國事三年一代若稱職者不拘年限對盧已下官總十二級置外州縣六十餘大城置倭薩一人比都督小城置道使一人比刺史其下各有僚佐分曹掌事其王以白羅爲冠白皮小帶咸以金飾其俗多淫祀事靈星可汗箕子等神國城東有大隧名曰隧神常以十月王自祭之俗好經書至于庶賤之家各于衢路造大屋謂之局堂子孫晝夜讀書習射前王姓高氏世通中國常遣使

朝貢
後唐同光三年十一月遣使廣評侍郎上柱國韓申一
副使春部少卿朴巖來貢方物至四年正月授韓申一
朝散大夫試殿中監朴巖朝散郎試祕書郎

天成四年八月復遣廣評侍郎張扮等五十二人來朝
貢銀香獅子銀鑑金裝釵鏤雲星刀劍馬匹金銀鷹繚
鞞白紵白氈頭髮人參香油銀鏤剪刀鉗釵松子等
長興三年二月復遣使大相王儒來朝其年六月以權
知國事王建爲特進檢校太保使持節元菟州都督充

大義軍使兼御史大夫上柱國高麗國王七月又以其
妻柳氏爲河東郡夫人

清泰二年十二月遣使禮賓卿邢順等來朝貢
三年正月以入朝使禮賓卿邢順試將作少監副使崔
遠試少府監主簿其年又遣使王子太相王規等來貢
方物以太相王規爲檢校尚書右僕射副使廣評侍郎
崔禹試將作監其隨行節級等三十餘人並授司戈司
陞等職

晉天福三年八月青州奏高麗國宿衛質子王仁翟乞

放歸鄉里從之

四年九月復遣廣評侍郎邢順等七十二人來貢方物
六年八月其國王王建爲開府儀同三司檢校太師使
持節元菟州都督充大義軍使高麗國王命國子博士
謝攀持節就冊之

八年十二月復遣王子大相王申一等來

開運元年正月以入朝使王子大相守倉部令上柱國
賜紫金魚袋王申一爲檢校尙書右僕射正朝守廣評
侍郎柱國丹金魚袋柳迴訓檢校禮部尙書守廣評郎

中韓李康試衛尉卿守廣評郎中朴元信試太府少卿
守兵部主事韋安試將作監主簿以進奉賀登極使正
朝前守廣平侍郎柱國丹金魚袋金仁逢可檢校工部
尙書副使禮賓卿柱國丹金魚袋金裕可試大府卿判
官兵部郎中張規可試衛尉少卿

二年其國王王建卒其子武嗣位十月遣使廣評侍郎
韓元珪副使前禮賓卿金廉等一十八人來朝十一月
以權知高麗國事王武爲特進檢校太保使持節元菟
州都督充大義軍使兼御史大夫高麗國王仍命光祿

卿范光政太子洗馬張李凝就行冊命王武者王建之子本國中大族國中推而爲主有智勇兵力日盛以兵并三韓百濟之地東夷君長最爲雄盛漢乾祐末王武死其子王昭代立

周廣順元年正月遣廣評侍郎徐逢等九十七人來朝貢二月以權知高麗國事王昭爲特進檢校太保使持節元菟州都督充大義軍使兼御史大夫高麗國王仍命衛尉卿劉暉通事舍人願彥浦持節冊之劉暉尋卒於路願彥浦溺海而死

二年九月復以太僕少卿王演借衛尉卿充高麗國冊禮使右衛率府呂繼贊借將作少監充副使

顯德二年十月復遣使王子大相王融來貢方物又遣廣評侍郎荀質來賀登極其年十二月授其國王王昭開府儀同三司檢校太師高麗國王

五年七月命尙書水部員外郎韓彥卿尙輦奉御金彥英使於高麗因命齎帛數千匹就彼市銅以備鑄錢之用

六年正月又遣其臣王子佐丞王兢佐伊皇甫魏光等

貢名馬織成衣襖弓劍等其年八月遣使進別序孝經一卷越王孝經新義八卷皇靈孝經一卷孝經雌圖三卷別序者記孔子所生及弟子從學之事越王新義者以越王為問日以疏在文之是非皇靈者止說延年辟災之事及志符文乃道書也雌圖者止說月之環暈星之孛孛災異之應乃讖緯之書也其年十一月遣使貢銅五萬斤紫白水精各二千顆

渤海

渤海靺鞨本高麗種唐總章中高宗平高麗徙其人散居中國置州縣于遼外就平壤城置安東都護府以統之至萬歲通天中契丹李萬榮反攻陷營府有高麗別

種大舍利乞乞仲象

大姓舍利官乞乞仲象名也

與靺鞨反人乞四

比羽走保遼東分王高麗故地則天封乞四比羽許國公大舍利乞乞仲象震國公乞四比羽不受命則天命將軍李楷固臨陳斬之時乞乞仲象已死其子大祚榮繼立併有比羽之眾勝兵丁戶四十餘萬保據挹婁故地至聖歷中稱臣朝貢中宗命侍御史張行岌就徃宣慰號其都為忽汗州以祚榮為忽汗州都督封渤海郡王國自是稱渤海其俗呼其王為可毒失對面呼聖王賤表呼基下父曰老王母曰太妃妻曰貴妃長子曰副

王諸子曰王子代以大氏爲酋長終唐室朝貢不絕
梁開平元年五月其王大諲譔遣王子大昭順來貢方
物至二年正月又遣殿中少令崔禮光來朝

三年三月遣其相大誠諤來朝兼貢女口

乾化二年五月又遣王子大光贊來朝貢方物太祖厚
有錫賜

後唐同光二年正月遣王子大禹謨來朝五月又遣王
子大元讓來朝莊宗賜金綵以遣之八月又遣姪學堂
親衛大元謙試國子監丞

三年二月又遣使裴璆貢方物進細女口五月以入朝
使政堂省守和部少卿賜紫金魚袋裴璆爲右贊善大
夫

天成元年四月遣使大陳林等一百十六人來朝貢進
男口女口各三人并人參昆布白附子等其年七月遣
使大照佐等六人朝貢先是契丹大首領邪律阿保機
兵力雄盛東北諸蕃多臣屬之以渤海國土地相接常
有吞併之志是歲率諸蕃部落攻渤海國扶餘城下之
改扶餘城爲東丹府命其子突欲留兵鎮之未幾阿保

機死渤海王命其弟率兵攻扶餘城不能克保眾而退
四年五月又遣高正詞入朝貢方物七月以正詞爲太
子洗馬

長興二年十二月遣使成文角來朝

三年正月又遣使來朝貢

四年七月以先入朝使成文角爲朝散大夫右神武軍
長史奏事右錄事試大理評事高保叉爲朝散郎右驍
衛長史並賜金紫

清泰二年十二月遣使列周道等入朝貢方物

三年二月以入朝使南海府都督列周道爲檢校工部

尚書政堂省工部卿烏濟顯試光祿卿

周顯德元年七月渤海國崔烏斯多等三十人歸化

新羅

新羅弁韓之苗裔其國在漢樂浪郡之地南東俱限大
海西接百濟北隣高麗東西千里南北二千里有城邑
村落其王所居曰金城周七八里衛兵三千人文武官
凡十七等風俗刑法與高麗略同而朝服尙白人多金
朴兩姓俗重元日相慶賀以是日拜日月之神婦人以

髮繞頭用綵及珠爲飾髮甚鬢美其王金眞唐武德四年封樂浪郡王龍朔三年又以其國爲雞林州授其王雞林州都督世以金氏爲酋長朝貢不絕

後唐同光元年十一月其王金朴英遣倉部侍郎金樂錄事參軍金幼卿來朝貢

二年六月又遣使朝散大夫倉部侍郎賜紫金岳來朝貢授金岳朝議大夫試衛尉卿

天成二年二月遣使張芬等來朝其年三月以新羅國權知康州事王逢規爲懷化大將軍新羅國前登州都

督府長史張希巖新羅金州知後官本國金州司馬李彥謨並檢校右散騎常侍其月又以入朝使中散大夫兵部侍郎兼賜紫金魚袋張芬爲檢校工部尙書副使兵部郎中朴述洪兼御史中丞判官倉部員外郎李忠式兼御史其年四月新羅國康州遣使林彥來朝貢召對於中興殿賜物有差

四年二月青州奏於登州岸獲新羅船一隻進其寶貨長興四年四月權知國事金溥遣使金胙來貢方物清泰二年二月以入朝使執事侍郎金胙爲檢校工部

尚書副使司賓大卿李儒試將作少監

黑水靺鞨

靺鞨蓋肅慎之地後魏爲勿吉在京師東北六千餘里東至於海西接突厥南界高麗北鄰室韋其國凡爲數十部各有酋帥而黑水靺鞨最處北方尤稱勁健俗皆編髮性凶悍無憂戚貴壯而賤老俗無文字兵器有角弓楛矢唐開元十年三月安東都督薛泰請於黑水靺鞨內置黑水軍以最大部落爲黑水府以其首領爲都督仍置黑水府長史一員就其部落監領之

後唐同光二年九月遣使兀兒來朝以兀兒爲懷化中郎將遣還番

三年五月黑水胡獨鹿遣使朝貢

天成四年八月遣使骨至來朝兼貢方物以骨至爲歸德司戈遣還番

長興元年二月其首領兀兒復遣使朝貢

二年五月青州奏黑水兀兒部至登州賣馬

三年二月青州奏黑水桃李花狀申父胡獨鹿卒所有勅賜朱記未敢行使

南詔蠻

南詔蠻本烏蠻之別種在漢永昌之東姚州之西蠻俗謂王曰詔其先渠帥有六故號六詔各有君長不相統攝唐時中亦時來朝貢

後唐同光三年閏十二月魏王繼岌奏遣使齎書招諭

南詔蠻時初平蜀川乃募曾使南詔者有秦州副使徐

命嗣王龜年使雲南謁季父為副使謁為判官時不到

黃巢東走乃託以他族而止

天成元年十月供奉官李彥楷高品李光裕雲南使迴

山後兩林百蠻都鬼主右武衛大將軍李卑晚差大鬼

主傅能阿花等來朝貢明宗御文明殿引對百官稱賀

拜李卑晚為靈遠將軍大渡河南山前邛川六姓都鬼

主懷安郡王勿定標莎為定遠將軍

二年七月以左金吾衛將軍烏昭遠為左衛上將軍入

蠻國信使其年九月西川奏據黎州狀申雲南使趙和

於大渡河南起舍一間留信物十五籠并雜牋詩一卷

遞至闕下初郭崇韜平蜀之後得王衍昔獲俘數千以

與蠻俘得往續有轉牒稱督爽大長和國宰相布變等

又入弄棟演習自鸚鵡邵膳裔爽等又入平夷新安寧
遠標莎差人轉送黎州其紙厚硬如皮筆力適健有詔
體後有督爽陀酉忍爽王實督爽彌勒忍爽董德義督
爽長垣緯忍爽楊布變等所署有彩牋一軸轉韻詩一
章章三韻共十聯有類擊筑詞頗有思本朝姻親之義
語亦不遜其籠中即返其國信舊封猶存復命左衛上
將軍烏昭遠
往皆不能去

牂柯蠻

牂柯蠻其地北去兗州一百五十里東至辰州二千四
百里南至交州一千五百里西至昆明九百里無城郭
散居村落多霖雨稻皆再熟無徭役唯征戰之時乃相
屯聚刻木為契其法劫盜者三倍還贓殺人者出牛馬

三十頭乃得贖死首領姓謝氏唐室頻遣使朝貢
後唐天成二年八月牂柯清州八郡刺史宋朝化等一
百五十人來朝貢進草豆穀二萬顆硃砂五百兩黃蠟
二百斤各賜官諾金帛遣之

昆明國

昆明部落在黔州西南三千里山路險阻住止高欄亦
有羊馬其俗椎髻跣足酋長披虎皮下者披氍毹
後唐天成二年八月昆明大鬼主羅殿王普露靜王九
部落各差使者隨牂柯來朝貢

占城國

占城國在中國西南其地東西七百里南北三千里東暨海西暨雲南南暨真臘國北暨驩州界東北至兩浙海行一月程其衣服制度大略與大食國同所乘皆象馬粒食稻米肉食水兕山羊之類獸之奇者有犀牛鳥之珍者有孔雀前世多不與中國通

周顯德五年九月其國王因德漫遣其臣甫阿散等來貢方物中有灑衣薔薇水一十五瓶言出自西域凡水之霑衣香而不黧又貢猛火油八十四琉璃瓶引對於丙殿賜以冠帶衣服等其表文以貝多葉檢以香木函其年十一月入朝使甫阿散金婆叵羅辭各賜繒帛有差仍命齎金銀器一千兩繒絲一千疋緹甲名馬銀鞍勒等就賜其國王

雜錄

後唐天成元年六月十日御史臺奏伏覩今月三日入閣班退後方引對朝貢番客竊觀近制頗失常儀且月華門是宰相兩省近侍官常朝來往之所外國番國朝見不合出在此門而又殿廷班序先退北者列其百辟

示彼四夷俾觀多士之羽儀以顯九重之嚴重豈可眾官退後番客方來合自正門直趨丹陛此是向來事例今辰忽有更張竊以方屬中興宜循舊典伏乞宣付中書門下重令參詳永爲定制奉勅宜令太常禮院檢舊例申奏者右太常禮院奏臣謹按開元禮以賓禮待番客有六一番國王來朝二戒番王見日三番王奉見四受番使表及幣五宴番國王六讌番國使從開元定禮之後本朝故事對諸番客又並於內殿引對其殿名曰參殿事在禮賓使客省使不下外諸司見今施行不一

近制惟迴鶻番使則正殿引對況迴鶻見居甘州其地元屬河西道涼州所管每遣使進表幣待以賓禮皇帝御正殿列百辟鋪陳盛儀酌禮沿情事恐太重伏請今後准諸番客例祇於內殿引對不臨正朝兼免乖越又符故事謹具詳酌如前奉勅四夷來王歷代故事前後各因強弱撫制互有典儀大番須示於威容則於正衙引對小番但推其恩信乃於內殿撫懷憲府奏論禮院詳酌皆徵故事咸有明文正衙威容未可全廢內殿恩澤且宜常行若遇大番入朝卽准舊儀於正殿排比鋪

陳立仗百官排班於正門引入對見

四年二月勅沿邊置場買馬不許番部至闕下

周廣順三年三月詔禁沿邊州城市兵仗於諸番部

五代會要卷三十

